


YUSUFU



The story of the prophet Joseph as recorded in the holy
Torah, the book of Moses.

Yusufu nana'onaa

Yakubu kú Kanaanɔ̀ bùsun gu kũ a de vùten. Yakubu burinɔ̀ yǎn dí. Yusufu bi kefennamɛ. A wě gěro awɛɛplade gũn kũ àten sǎnɔ̀ dǎ kũ a vǐninɔ̀, a de nɔ̀nɔ̀ Bila kũ Zilipao nénɔ̀, akũ à dà vǎni kũ ò kèè kɔ̀rɔ̀mɔ̀tɔ̀tɔ̀ kè a denɛ. Isaraila ye Yusufui de a né kparanɔ̀la kũ à a ì a zĩkũnaa gũn yǎi, akũ à utagyabaa zǝnɛ. Kũ a vǐninɔ̀ è n de ye Yusufui deńla, akũ ò zǎagu òdi we ò yǎ nna o kǎaoro.

Yusufu nana ò, akũ à bàba a vǐninɔ̀nɛ, akũ ò èra ò zǎagu de zĩ póla. À pínɛ: À nana kũ ma ò ma. Ma è óten ése yĩyĩ bura, akũ ma ése baka fùte à zè. Á pónɔ̀ lìkai, akũ ò nàtenɛ. Akũ a vǐninɔ̀ pìnɛ: Īni kí blewán yá? Īni gbǎna ble wán yá? Akũ ò èra ò zǎagu de yǎ póla nana kũ à òo pì yǎi.

Yusufu èra à nana ò dɔ̀, akũ à bàba a vǐninɔ̀nɛ à pì: Ma era ma nana ò dɔ̀. Ma è ifǎntě kũ mɔ̀vuraao kũ susunɛ mèn kuri awɛedonɔ̀ ten natemɛnɛ. À nana pìi bàba a denɛ dɔ̀, akũ a de pàtaa à pì: Nana kpate takan n ò lɛɛ? Makũ kũ n dao kũ n vǐninɔ̀, óni su ò kúte n aren yá? A vǐninɔ̀ nèsɛgǝbaa sè kǎao. A de sǝ à nana pì yǎ kũna a nèsɛɛ gũn.

A vǐninɔ̀ gèè n de sǎnɔ̀ dǎ Sɛkemu. Akũ Isaraila pì Yusufunɛ: N vǐninɔ̀ ten sǎ dǎ Sɛkemu. Mani n zĩ n kĩnaa. À wèa à pì: Ma laka. Akũ à pìnɛ: N gè n n vǐninɔ̀ gwa kũ sǎnɔ̀, tó ò aafia. N era n sumenɛ kũ n baaruuo. Akũ à a gbàrɛ, à bò ɛblɔ̀nu guvuten à gèè Sɛkemu. Àten likara sɛn,

akū gōgbē ke dàale à a là: Bón nten wetee? À wèa à pì: Mateni ma vīnino weteme. Tó í í sādāki dō, ò omene. Gōgbē pìi pì: Kū ò bò gu dín, ma mà ò pì òten gé Dotāme. Akū Yusufu pèteńyĩ à í lé Dotā.

Kū ò a è zā dire, ari àgō gé ká í kīnaa, ò lé kpākūsūi ò pì ò a de. Ò pìkōne: À gwa, nana'ori ten su zā dire. À tó ò a de ò a zu lògō dínō doke gūn. Óni pì nòbō pāsī mé à a dè à sò. Ēhē óni e lākū a nanano ni mì de nà. Kū Rubeni yā pìi mà, à ye à a mì sí, akū à pì: Òsun a dero, àsun aru boaro. À a zu lògō dīkīnan gbárannan la. Àsun a dero. Rubeni óńne le, kū à ye à a mì sí à a kpá a dea yāime. Kū Yusufu kà a vīnino kīnaa, ò a uta bò, a utagyaba mana pìi. Akū ò a sè ò a zù lògō pìn. Lògō pì da korime à í vīro. Akū ò vùte òten pó ble. Kū ò wé sè, ò Sumaila buri lagatarino è, ò bò Giliada bùsun òten gé Misila. Í lakuminon do póno kū lí'w ezeo kū lí'w gbĩ nnao sēna. Akū Yuda pì a gbēnōne: Tó o ó dakūna dè, akū o a gēe ùte, bó àreen óni lee? À tó ò a yía Sumaila buri pìnca. Òsun a dero, ó dakūnanloo? Ó aru dokōnōme. Akū a gbēno a yā mà. Kū Midiā lagatari pino ten su gē zēla, akū ò Yusufu gà ò bò lògon, ò a yia Sumaila buri pìnca andurufu baro, akū ò tà kāao Misila.

Kū Rubeni sù lògō pì kīnaa, adi Yusufu e gwe doro, akū à a pókasanō gà à kēkē, akū à gēe a dakūnanō kīnaa à pì: Né pì kú gwe doro. Mani gé má kū abireoo? Ò blèkofinii kù ò dè, akū ò Yusufu uta pìi sè ò màte a aru gūn. Akū ò a

utagyabaa pìi sè ò gèeo ní dene ò pì: Pó kũ o èn dí. N né utan yá, ke a pónlo? À dǝ, akũ à pì: Ma né utame, nòbo pāsī mé à a sò. Waiyoo, ò ma né Yusufu kè yákiyakime. Akũ à a uta zǝkǝ gà à kè à pókasa sè à dà, akũ à a né pì wēnda kè gikena. A nэгǝgbēnǝ kũ a nénǝgbēnǝ sù a laakari kpátene ní pínki, ama à gí a laakari kpátei à pì: Manigǝ ma né pìi gè ǝo dǝme ari mà gé táo a kīnaa gyāwān. Akũ àten wēnda ǝo dǝ a né pì yā musu.

Midiā pìnǝ sǝ ò Yusufu yia Pǝtifaa Misila. Firi'auna ìba keme, àkūme a dogarinǝ gbē zǝkǝ ũ.

Yusufu kũ Pǝtifa nanǝ

Kũ Sumaila burinǝ kà kũ Yusufuo Misila, akũ Misila gbē Pǝtifa a lùmma. Firi'auna ìba keme, àkūme a dogarinǝ gbē zǝkǝ ũ. Dikiri kú kũ Yusufuo, akũ à sa'a kũ. À kú a dikiri Misila gbē pì bea. Kũ a dikiri pìi è Dikiri kú kāao àdigǝ a dakare kũ sa'ao yā kũ àten kenǝ gūn pínki, akũ Yusufu a ponna lè. Pǝtifa a dǝte a azia ũ à pó kũ à vīnǝ nàne a ǝí pínki. Zaa gǝrǝ kũ à a dǝte a azia ũ, Dikiri arubarikaa dà a ben Yusufu yāi. Dikiri arubarikaa dà pó kũ à de a pó ũnǝgu pínki, be pónǝ kũ burapǝnǝn yá. Akũ Pǝtifa a pó sīnda pínki nà Yusufune a ǝí. A bàka kú yākeoro, tó adi ke póble baasiro. Yusufu sǝ bi gǝ kefenname, akũ a zena mana.

Zīkea Yusufu ni gè a dikiri nanǝgu, akũ à pìne: Ì wúte kūmao. Akũ à gí à pì: Ì gwa, ma dikiri bàka kú yākeo ǝn dí gūn doro, à pó kũ à vīnǝ nàmene ma ǝí pínki. A gbāna

demala ɔn dí gũnlo, adi gímenɛ kũ pókero, sé mɔkɔn, kũ
ń de a nɔ ũ yāi. Mani fɔ mà yā vāni bire taka ke mà
durunna ke Ludanero. Bee kũ nɔgbɛ pìi dìgɔ onɛ baabɔre,
adi we à wùte kãaoro, à ye àgɔ kú kãao sero.

Zíkea kũ Yusufu gɛ̀ kpén a zĩ ke, à sù à lè ɔn zĩkeri ke kú
kpé gũnlo. Akũ nɔgbɛ pì a kũ a utaa à pì: N wúte kũmao.
Akũ Yusufu a uta tònɛ gwe à bàa lè à bò bàai. Kũ nɔgbɛ pìi
è à a uta tòare à bàa lè à bò bàai, akũ à ɔn zĩkerino sìsi à
pínne: À gwa, ò sùwere kũ Eberuo, akũ àten dɔke kũoo. À
gɛ̀mai à wúte kũmao, akũ ma wiki lè. Kũ à mà ma wiki
dɔawa, akũ à a uta tò katena ma sare à bàa lè à bò bàai.
Akũ nɔgbɛ pìi uta pìi kàte a sare ari Yusufu dikirii sù, akũ
à pìne: Eberu zò kũ n su kãaowere dɔkè kũmao à gɛ̀mai. Kũ
ma wiki dɔa, akũ à a uta tò katena ma sare à bàa lè à bò
bàai. Kũ nɔgbɛ pì yā pìi ò a zāne à pì, lákũ n zò kèmene
nàn gwe, akũ Yusufu dikiri pɔfɛ manamana. Akũ à pì ò
Yusufu kũ ò a da kpésiran, gu kũ gbɛ kũ kína bàa
dòrmanno káten, akũ à goro pla kè gwe.

Bee kũ abireo Dikiri kú kãao à gbɛke kènɛ à tò a yā kà
purusunano dākpārigu. Akũ dākpārii pì purusunano nà
Yusufune a ɔĩ ń pínki, òdi yāke ke a sariro. Purusunano
dākpārii pìi bàka dìgɔ kú Yusufu yāoro, kũ Dikiri kú kãao
yāi, akũ àdigɔ a dakare kũ sa'ao yā kũ àten ke gũn pínki.

Yusufu purusunano nana bokotena

Abire gbera Misila kina Firi'auna wekpaateri ku a burodikeriio taari kene. A po fe a iba gbeneon pla pinji, a wekpaateriki ku a burodikerikio. Aku a ni ka kpesiran a dogarinjo gbe zoko bea, kpe ku o Yusufu dan. Dogarinjo gbe zoko pi Yusufu dite ago ni gwa, aku o goro pla ke kpe pin gwe.

Gwani dokona Misila kina wekpaateri ku burodikerii pio nana o ni gbeneon pla ni pini, baadi ku a po ku a bokotenaao. Ku Yusufu su ni gwa konko, a e ni ann sisi. Aku a ni la a pi: Bo ya me a to a an sisina gbaraa? O wea o pi: Nanan o o, gbeke ku la ku a a lesi owerero. Aku a pine: Luda me a nana lesi bokotena viroo? A a nana pinjo omene ma ma. Aku wekpaateriki a po ene a pi: Ma nana gun ma geepi li e ma sare. Geepi li pi ene aakome. A la bo a vu ke a ne i a ma. Ma Firi'auna toko kuna, aku ma geepi ne pinjo se ma fe a toko pii gun ma kpa. Yusufu pine: Nana pii bokotenan di. Li'ene aakoo pinjo bi goro aakome. Goro aakoo gbera Firi'auna ni n mi si. Ani era a n da n zi gun, ini era ngo we bone lakui ndigo ke na ya. To ya bo kunwo nna, n to ma ya go dongu. N gbeke kemene n ma ya o Firi'aunane de a ma bo kpesira di gun. Zaaku o ma ku kpani zaa Eberu busun, aku bee Misila la madi yake ke a ka o ma da we di gunlo.

Kū burodikeriki è Yusufu nana pìi àlesi'onaa bò kū wēkpaateriio nna, akū à pìne: Ma nana gūn sō ma è má burodi sēna tānko aakō dikōana. Tānko kū à kú musu, burodi buri dasi kū ma kē Firi'aunane ká a gūn, akū bāno ten ble ma musu. Yusufu pìne: A bōkōtenan dí. Tānko aakō pìno goro aakōmē. Goro aakō gbera Firi'auna ni n mī zō à n loko lía, bāno ni n ble.

A goro aakōde sō Firi'auna igoro là kōkōmē, akū à poble kē a ibanōne. À wēkpaateriki kū burodikerikio bōte kpén a ibano wára. Akū à èra à wēkpaateriki dà a zīn à era àgō í boare. Akū à burodikeriki lòko lía lākū Yusufu ní nanano bōkōtenaa òñne nà. Yusufu yā dí dō wēkpaaterikin doro, a yā sàagu.

Yusufu Firi'auna nana bōkōtenaa

Wē pla papanaa gbera Firi'auna nana ò, à è á zēna Nili léa. À è zūda mana mēkpanano bōte swa pìi wēen mēn suppla òten sē ble tàfee gūn. Akū à zūda fēfēna wōkōwōkōno è mēn suppla dō. Ò bò swawēen ò tè a káakupōno kpe ò zē ní sare swa léa. Akū zū fēfēna wōkōwōkō pìno zū mana mēkpana pìno mōmo, akū Firi'auna vù.

À èra à i ò, akū à nana ò dō. À è ése sáko mana wéde pìà ése lí dokōnōa sáko suppla. Akū à ése sáko wé kōgōkōgō kū legū'i kīāmmano è, à pìà ní gbera dō sáko suppla. Akū ése

sáko wé kɔɔkɔɔ pìno ése sáko mana wéde pìno mòmɔ. Kū Firi'auna vù, à è nanan a ò.

Kū gu dò, à kú bídi gūn, akū à Misila māsokerino kū wézérino sisi ní pínki. À a nanano bàbañe, ama ní gbēke dí f̃ à a bɔkɔtenaa ònero. Akū wēkpaateriki fùte à yā ò Firi'aunane à pì: Taari kū ma kè yā dòmagu gbāra. Kí, n pò f̃ n zòblerinoi yā, akū n ma da kpésiran n dogarino gbē zōkō bea leelee kū burodikerikio. Gwāani dokōnɔa o nana ò, ó baadi kū a póo kū a àlesiio. Eberu kefenna ke kú kūoo gwe, n dogarino gbē zōkō zòome. Kū o ó nanano bàbane, akū à ó baadi pó bɔkɔtenaa òne. Yā pìno kè lākū à òwere nà. N era n ma da ma zīn, akū n burodikeriki pìi lòko lía.

Akū Firi'auna gbē zī ò Yusufu sísi, akū ò gèe ò a bò wèen likalika. À mii bò à a pókasanɔ líte, akū à gèe Firi'auna kīnaa. Akū Firi'auna pìne: Ma nana ò, gbēke dí f̃ à a bɔkɔtenaa òmenero. Ma mà ò pì, tó ò ònne, ndi f̃ n a àlesi oñne. Yusufu pìne: Adi ke makūmero, Luda mé ani a àlesi onne, kí. Akū Firi'auna pìne: Ma nana gūn ma è má zena Nili léa. Ma è zùda mana mèkpana mèn supplanɔ bòte swaween òten s̃e ble tàfee gūn. Akū ma zùda pāndenɔ è dɔ mèn suppla ò f̃f̃ena wɔkɔwɔkɔ, mádi zù f̃f̃ena bire takano e Misila la zikiro. Akū zùda f̃f̃ena wɔkɔwɔkɔ pìno zù mèkpana káakupɔ mèn suppla pìno mòmɔ. Bee kū ò ní mómɔ, ò g̃ f̃f̃ena lán yā bàme, gbēke ni dō kū ò ní mómɔ sero. Akū ma vu. Nana gūn dɔ ma è, ése sáko mana wéde

pia ése lí dokõṇṇa sáko suppla. Akũ ma è ése sáko térere wé kɔgɔkɔgɔ kũ legũ'i kĩaṁmanɔ pia n gbera dɔ sáko suppla. Akũ ése sáko wé kɔgɔkɔgɔ pìnɔ ése sáko wéde pìnɔ mòmɔ. Kũ ma ò mäsokerinɔṇe, n gbẽke dí fĩ à a bɔkɔtenaa òmènero.

Akũ Yusufu pìnɛ: Kí, nana kũ n òo pìnɔ àlesi dokõṇṇe. Luda yã kũ à ye à ke mònṇeme, kí. Zù mana mèn suppla pìnɔ bi wè supplame. Ése sáko wéde sáko suppla pìnɔ sã wè supplame. Nana pìnɔ àlesi dokõṇṇe. Zù fẽfẽna wɔkɔwɔkɔ mèn suppla kũ ò bòte ò tè a káakupɔṇɔ kpe pìnɔ bi wè supplame. Leme ése sáko wé kɔgɔkɔgɔ kũ legũ'i kĩaṁma sáko suppla pìnɔ de le dɔ. Abirekũṇṇe wè suppla kũ nà ni ká ũ. Lákũ ma ònne nà tera, kí, ma pì Luda ten yã kũ à ye à ke mònṇeme. Póblewe nigõ di Misila gu sinda pínkia manamana ari wè suppla. Abire gbera nà ni gẽ ari wè suppla, kãna gbãna pì yã ni sã Misilanɔgu. Nàa pì ni búsuu pì de. Nà kũ ani su pì nigõ pãsi manamana, kãna gbãna pì yã ni dɔ gbẽkegu doro. Kí, kũ gèn plame n nana pì ò, kũ Luda mé à dìte yãime. Ani ke terame, à sika vĩro. Tera sà kí, n wézẽri ɔndõde wetɛ n dìte àgõ de gbãnade ũ Misila. Kí, n gbẽṇɔ dìte gbẽ zõkõṇɔ ũ Misila ògõ póblewe sɔɔrode kakara wè suppla kũ póblewe nigõ din pìi gũn. Oni póble kakara wè mana kũ àten sunɔ gũn ò póblewe ká dõṇɔ gũn wète kũ wèteo kũ n tóo, onigõ dākpā. Tó nà kũ ani ke

wě suppla pìi kà Misila, póble pì nigõ de zâna ù de nàa pì sún Misilano dèdèro yâi.

Yusufu kíblena Misila

Yâ pìi kà Firi'aunagu kû a ìbano nínkí, akû à pìnnè: Gbê dí Luda Nini vî. Óni gbêke e lán a bà dɔ yá? Akû à pì Yusufunè: Lákû Luda tò nín yâ bireno dõ pínkí nà, wézèri òndõde ke kun lán n bàro. Mòkõn mé ìnigõ de ma on gbê zõkõ ù, ma gbèno nigõ mì natenne nínkí. Kpata mé ani tó màgõ denla ado. Akû à èra à pìnè: Ìnigõ gbàna vî Misila bùsu gu sînda pínkia. Akû à tãnka sèedakebɔɔ bò a onèa à dà Yusufunè a onèa, à taasaa uta dànè à wura gèrèe dànè a wakaaa. À a sɔgo plade kpàa táa'obɔ ù, akû gbê kû ò done areno dīgõ pata: À kúte! À kúte! Leme Firi'auna tò Yusufu gbàna vî Misila bùsun lè. À pìnè dɔ: Makû Firi'auna, gbêke ni fɔ à yâke ke Misila la n lé sariro. À tó kpànè Zafena Panèa, akû à Eliopoli wète sa'ori Potifera nénɔgbê Asena kpàa nɔ ù.

Gɔɔ kû Yusufu zî lè Misila kína Firi'auna bea, a wè baraakurime. Akû à bò Firi'auna kînaa à gèe à kurè Misila gu sînda pínkia. Kàna gbàna kun ari wè suppla, póblewe din manamana. Akû Yusufu póblewe kû à di Misila wè suppla pìnò kàkara wète kû wèteo zâna ù, wète sînda pínkí kû a bura kû ò likaino póo. A póblewe kàkara zõkõzõkõ lán ísirale bùsu'atè bà, akû ò zè a zaka lé yõnaaa, kû oni fɔ ò a lé dõro yâi.

Ari nà gō gé ká Yusufu nanɔ Asena, Potifera né, nēgōgbēnɔ ò mèn pla. Yusufu tó kpà a dauduune Manase à pì: Luda tò ma de bedenɔ kũ wari kũ ma kèeo yā sāmagu pínki. Akũ à tó kpà a pladenɛ Eflaimu à pì: Luda tò ma gō néde ũ b̀usu kũ ò wé tãman.

Kũ kãna gbãna kũ à kú Misila wè suppla pìi làka, akũ wè suppla kũ nà ni ká d̀ate lákũ Yusufu ò nà. Nàa kà b̀usu kũ b̀usuuo pínki, ama p̀oblewe di Misila gu s̀inda pínkiamɛ. Kũ nàa gè Misilanɔgu pínki, ò wiki lè Firi'aunane à p̀oble kpámma. Akũ à p̀inne ní pínki: À gé Yusufu kinaa à ke lákũ ani oáre nà. Nàa dà b̀usuu pila pínki, akũ Yusufu d̀onɔ wèwè à p̀oblewe yia Misilanɔa, kũ nàa pì gbãna kũ ní b̀usun yāi. Akũ gbēnɔ bò andunia gu pínkia ò s̀u Misila p̀oblewe lú Yusufua, zaakũ nà gbãna kũ andunia gũn pínkimɛ.

Yusufu v̀inino suna p̀oblewe lú Misila

Kũ Yakubu mà p̀oblewe kú Misila, à pì a nénɔne: Ánigō káte la pã yá? Ma mà p̀oblewe kú Misila. À gé lúwɛɛ gwe, de òsun garo, ògō kun aafia yāi. Akũ Yusufu v̀ini gbēnɔn kurinɔ gèe Misila p̀oblewe lú. Yakubu dí Yusufu dakũna Biliaminu zĩ kũnworɔ, zaakũ à pì: Òdigō d̀oro tó yā v̀ani ni a le. Akũ Isaraila né pinɔ gèe p̀oblewe lú kũ gbē pãndenɔ, zaakũ nàa pìi kà Kanaanɔ b̀usun dɔ.

Yusufu mé à b̀usuu pì gbē zōkō ũ. Àkũ mé àdi p̀oblewe yia gbē s̀inda pínkia. Akũ a v̀inino s̀u ò k̀utene ò ní are pète zĩte. Kũ à a v̀inino è, à ní dō, akũ à a zĩda kèinne nibɔ ũ. Akũ

à yā òńne pāsīpāsī à ń lá à pì: A bo máa? Ò wèa ò pì: O bo Kanaano bùsun o su póbłewe lúme. Yusufu a vīnino dǎ, ama odi a dǎro. Nana kũ à ò yā ń yā musu dǎagu, akũ à pìńne: Gu'asirigwarinon á ũ, a su ó bùsu kīaki gwame. Ò wèa ò pì: Oi dikiri! N zòblerinon ó ũ, o su póbłewe lúme. Dedokōndenome ó ũ ó pínki. Náanidenome ó ũ. Ókōno n zòblerino, gu'asirigwarinome ó ũro. Akũ à pìńne: Ékeme! A su ó bùsu asiri dǎme. Ò pì: Ókōno n zòblerino, dedokōndenome ó ũ, ó gbēnon kuri awēplame. Kanaano bùsu gbēnome ó ũ. Ó dakūna gǎ be kũ ó deo, ó gbē do kunlo. Akũ Yusufu pìńne: Lákũ ma òáre nà, gu'asirigwarinome á ũ. Yā kũ ani tó mà á yāpura dǎn dí. Kũ Firi'auna kunnaao áni bote laro, séto á dakūna pìi sù la baasiro. À á gbē do zī à á dakūna sé, á gbē kparano ni gō kpésiran la, mani dǎ tó á yā yāpurame. Tó lenlo, kũ Firi'auna kunnaao gu'asirigwarinon á ũ. Akũ à ń ká kpén ari goro aakō. A goro aakōde zī à pìńne: Má Luda vīna vī. À yā kũ mani oáre ke áni bo aafia. Tó náanidenome á ũ, à á gbē do tó da kpén la, á gbē kparano ni tá kũ póbłeweo á bede nàderinone, áni era à sumene kũ á dakūna pìio, mani dǎ kũ á yā yāpurame, oni á dede doro. Akũ ò wèi le.

Ò pìkōne: Yāpurame taaridenon ó ũ yā kũ o kè ó dakūnane yā yāi. O è goro kũ àten kúte kewere, à kè wēnda, akũ ódi a yā maro. Abire yāin yā dí ó lé. Akũ Rubeni pìńne: Kũ ma òáre àsun yāke ke né pìinero, ádi ma

yã maro. A aru fīnan Luda ten bowá dí. Ò dǝ Yusufu ten maro, zaakũ kũ àten yã ońne, òten liteńnemε. Akũ à gò ní kīnaa à gèè à ɔɔ dǝ. Kũ à sù, à yã òńne, akũ à Simeɔ bò ní gũn à a yĩ ní wára. Yusufu pì ò póblewε káńne ní asasano pa ò ní baadi ɔɔɔ dane a pón ò zé kusuna keńne. Kũ ò kèńne le, ò ní póbleweno di ní zaakinone, akũ ò dà zén.

Kũ ò kà gu kũ òten in, kũ ní gbē do a asasa pòro de à pó kpá a zaakia, akũ à a ɔɔɔ è a asasa lén. Akũ à pì a gbēnone: À ma asasa gũn gwa, ò ma ɔɔɔ sùkpamene! Akũ swēē kēńgu, ò pìkōne kũ lukanaao: Bó yān Luda kèwεre lee? Kũ ò kà ní de Yakubu kīnaa Kanaano būsun, ò yã kũ à ní lé bàbane pínki ò pì: Bùsu gbē zǝkǝ pì yã òwεre pāsīpāsī, a ó díte gu'asirigwarino ũ. O pìne náanidenome ó ũ, gu'asirigwarinome ó ũro. Dedokōndonome ó ũ, ó gbēnon kuri awεεplame, ó gbē do kunlo, ó dakūna gǝ Kanaano būsun kũ ó deo. Akũ bùsu gbē zǝkǝ pì pìwεre yã kũ ani tó á ó dǝ náanidenon ũn dí. À pì ò ó gbē do tó kāao, ò póblewε sé ò táo ó bedε nàderinone, ò era ò suáre kũ ó dakūnao, áni dǝ sà kũ gu'asirigwarinome ó ũro, náanidenome ó ũ, áni ó gbēndo kpáwá, óni laga tá būsuu pìn.

Kũ òten póblewε bote ní asasano gũn, ní baadi a ɔɔɔōndonon è a pó gũn. Kũ ò ní ɔɔɔon è le, vīna ní kũ ní pínki kũ ní deo. Akũ ní de pìńne: Á ye mà gǝ né sarin yá? Yusufu kunlo, Simeɔ kunlo, akũ á ye à Biliaminu síma do yá? Yã sīnda

pínki ten bomene vānime. Akū Rubeni pì a dene: Tó mádi su kãaonnero, ò ma nēgōgbē plano dede. Ñ a kpáma, mani su kãaonne. Akū Yakubu pì: Ma né ni gé kãáoro, zaakū a vīni dadokōnde gà, àkū à gō ado. Ma zī kū. Tó yāke a lè tá kū áten o gūn, ani tó mà tá miran kū pōsiraome.

Yusufu vīnino era ò gena Misila kū Biliaminuo

Nà pāsī kū Kanaano būsun. Kū ò póblewē kū ò bòo Misila blè ò làka, í de pīnne: À era à gé póblewē lú fíti do. Akū Yuda pīne: Gōgbē pīi òwere sānsāmmē à pī, tó ó dakūna kú kūoro, óni wé sikōlero. Tó ĩni we ó dakūna gé kūoo, óni gé ò póblewē lúnne. Tó ndi we sōro, óni géro, zaakū gbē pīi òwere, tó ó dakūna kú kūoro, óni wé sikōlero. Akū Isaraila pì: Bó yā mé à tò a wari dōma, kū a ò gbē pīine á dakūna vīi? Ò wèa ò pì: Àkū mé à yā gbèkawá kū ó bedeno yāo à pì: Á de kun ari tera yá? Á dakūna vī yá? Yā bireno musun o wea. Ó dō yā ani pī ò su kū ó dakūnaon yá? Akū Yuda pì a dene: Ñ tó né pī gé kūmao. Óni fute ò gé gōnme, de ókōno kū mōkōnwo kū ó nēno òsun gagaro yāi, ónigō kun aafia. À gō ma yā ūme. Ma a zīda wēndii òte a pō gēne ū. Tó mádi su kãaonne aafiaro, ma gō n taaride ūme. Tó ódi sika ke yāro, de o ge kū gēn pladeo o su. Akū í de pīnne: Tó leme, à yā díkīna ke. À ó būsū pō manano sēte à ká á asasano gūn à gé à gōgbē pī gba. À lí'ò eze sé fíti kū zó'io fíti kū do pōno kū lí'ò gbī nnannao kū gōroko kū sīo. À gé kū ogo leu pla à ogo kū ò

dàáre á asasano gũn erañne. Ke ò sàten yá, á dõro. À á dakũna sé à era à gé gõgbẽ pì kĩnaa. Luda Gbãnasĩndapinkide tó gbẽ pì á wẽnda gwa à á gbẽndo kũ Biliaminuo gbare ò su kãáo. Makũ sõ, tó Luda ma néno sìmame, à sìman gwe.

Ò pó kũ oni gé ò a gba pìno sète kũ ɔgo leu pla kũ Biliaminuo ò fùte ò gèe Misila, akũ ò gèe Yusufu kĩnaa. Kũ Yusufu Biliaminu è n tẽ, à pì a begwariine: Nè gé kũ gbẽ bireno ma bea. Nè nòbo de n keke, zaakũ gbẽ pìno ni pó ble kũmao fãnantẽaramẽ. Begwarii pì yã kũ Yusufu dãnẽe kè à gèe kũńwo a bea. Kũ òten gé kũńwo Yusufu bea le, vĩna n kũ ò pì: ɔgo kũ ò dà ó asasano gũn yã mé à tò òten su kũoo la. Ò ye ò létewá ò gbãna mowere ò ó kũkũ zònno ù ò ó zaakinno sétẽmẽ. Kũ ò kà Yusufu be kpéleleá, ò nà a begwarii pìii ò pì: Mare, n yã nna! O su ò póblewẽ lú la yã káaku. Kũ o ka gu kũ óni in, o ó asasano pòro, akũ ó baadi a ɔgo lè a asasa lén papana. Akũ o su kũ ɔgo pìio ó ɔĩ. O su kũ ɔgo pãndeo de ò póbale pãnde lúo. Ó dõ gbẽ kũ à ɔgo pìi dà ó asasano gũnlo. Begwarii pìi pì: Àsun damu kero, àsun vĩna kero. Á Luda, á de Luda mé à ɔgo pìi dàáre á asasano gũn. Á ɔgo ma ki lè. Akũ à Simeo bòñne. Begwarii pìi gè kũńwo Yusufu onn, à í kpámma ò zú oo, akũ à sèẽ kpà n zaakinna. Akũ ò pó kũ oni Yusufu gba pì yã kèke ari àgõ gé su fãnantẽ, zaakũ ò mà oni pó ble a beame.

Kū Yusufu sù bɛ, ò a gbà pɔ kū ò sùoo pìnɔ ò wùtɛ zītɛ a arɛ. À n aafiaa gbèka, akū à pì: Á de zīkūna kū a a yā òo pì gbāna yá? À kú kū wëndiio yá? Ò wèa ò pì: Ó de n zòbleri gbāna à kun ari tera. Akū ò kùtɛnɛ ò arɛ pètɛ zītɛ. Yusufu wé sè à a dakūna dadokōnɔde Biliaminu gwà à pì: Á dakūna kū a a yā òmɛnɛ pìin dí yá? Akū à pì Biliaminunɛ: Luda arubarika dangu. Kū à a dakūna gwà, a pɔ kè nna zōkō à ye à ɔɔ dɔ, akū à gè kpénen likalika à ɔɔ dò gwe. Kū à ānn pìpi, akū à bò à a zīda kū à pì ò su kū póbleo.

Ò póble dītɛnɛ ado, n pɔ sɔ adona, Misila kū ò kú kāaonɔ pɔ adona dɔ, zaakū Misilano dì pɔ ble kū Eberunɔro òdi kakara kūnworɔ. Ò n vùtɛvutɛ a arɛ n sárakɛa, zaadauduua ari n gbɛ kpɛdea, akū ò lé àtɛ ò kɔ gwàgwa. Akū ò póble kū à kú Yusufu arɛ kpàatɛtɛnɛ. Biliaminu pɔ zōkō de gbɛ kparano póla leu sɔɔro. Akū ò pɔ blè ò í mì kū Yusufuo ari ò kà.

Andurufu toko dana asasan

Yusufu pì a begwariinɛ: N póblewɛ káka gbɛ pìnɔnɛ n asasanɔ pa lákū oni fɔ ò sé nà. N baadi ɔɔɔ danɛ a asasa lén n ma andurufu toko sé n da n dakūna asasan kū a póblewɛ ɔɔɔo. Akū à kè lákū Yusufu ònɛ nà. Kū gu dò gōnɔ, ò n gbáɛ kū n zaakinɔ. Ari ògɔ gé ká zā, akū Yusufu pì a begwariinɛ: N fute n pétɛnyĩ. Tó n n lé, n n la n pi bó yā mé à tò ò fīnaa bòmɛnɛ kū a vānio a mana gēnɛ ũu? Bó yā

mé à tò ò ma toko kũ madì í mio mà màso keoo sè kpānii?
N̄ on̄ne kũ ò yā vāni kè.

Kũ à n̄ lé, à yā p̄i òn̄ne, akũ ò wèa ò p̄i: Mare, à kè dera
n ò lee? Kúku! Ókōn̄o n zòblerin̄o, odì yā bire taka kero.
Ogo kũ o lè yā ó asasan̄o lé gũn, ódi era o suon̄ne bona zaa
Kanaaroo? Óni f̄o ò andurufu ke wura sé kpāni n dikiri bea
yá? Mare, ó gbē kũ n lè a kīnaa, ade gà, ó pínki óni gō n
zòn̄o ũ. À p̄i: Tò, à ke lákũ a ò nà. Gbē kũ ò lè a kīnaa ni gō
ma zò ũme, á gbē kparan̄o ni gō taari sari. Akũ n̄ baadi a
asasa kipa à pòro gòn̄o. Akũ begwarii p̄i n̄ asasan̄o
gwàgwa. À nà n̄ v̄ini póa ari à gèe à kào n̄ dakūna póa, akũ
à toko p̄i lè Biliaminu pó gũn. Ò n̄ utan̄o gà ò kèkè, akũ n̄
baadi a aso ȳi a zaakine ò èra ò gè wēte gũn. Kũ Yuda kũ a
gbēn̄o kà Yusufu bea, ò a lè gwe, akũ ò kùte a are z̄ite. À
p̄in̄ne: Bóyāin̄ a kè lee? Á d̄o kũ ma taka dì màso keroo?
Yuda wèa à p̄i: Dikiri, óni pin̄ne deramee? À yāke ona v̄iro.
Óni ke dera ò ó z̄ida bo yānn̄? Luda mé à bò ó taaria.
Dikiri, o gō n zòn̄o ũ dí, ókōn̄o kũ gbē kũ ò toko p̄i lè a
kīnaao. Akũ Yusufu p̄i: Kai! Mani f̄o mà abire kero. Gbē kũ
ò toko p̄i lèa mé ani gō ma zò ũ, á gbē kparan̄o áni era à tá
á de kīnaa aafia.

Yuda wékena Yusufua Biliaminune

Akũ Yuda nài à p̄i: N yā nna dikiri! N̄ tó makũ n zòbleri
mà yā on̄ne. N̄sun p̄o fēmairo dikiri, zaakũ n̄ sára kũ
Firi'aunaome. Dikiri, n̄ ó lá yā tó ó de v̄i ke dakūna. Akũ o

pì ó de zĩ kũ, akũsĩ ó dakũna kun dɔ, ó de a ì a zĩkũnaa gũmme. Né pìi vĩni dadokĩnɔde gà, àkũ mé à gĩ̃̃ ado, akũ ó de pì yei manamana. N ò ókĩnɔ n zòblerinɔne ò a sé ò su kãaonne de ñ wé siale. Dikiri, o pìnne né pì ni fĩ à a de tóro. Tó à a tò, de pì ni game. Akũ n pìwere, tó ódi su kũ ó dakũna pìoro, óni wé sikõlero. Kũ o ta ó de kĩnaa, o n yã òne. Akũ ó de pìi pì ò era ò gé póblewɛ lú fíti dɔ. O pì, tó adi ke ó dakũna kú kũoo baasiro, óni fĩ ò géro, zaakũ tó à kú kũooro, óni wé sikõlero. Akũ ó de pìwere, ó dũ kũ a nanné ì mèn pla. Kũ a do bò a bea, adi a e doro ari gbāra. À pì nòbɔ pāsĩ mé à a sò. À pì tó o né bire siawa, akũ yã vāni a lè, lākũ a zĩ kũ nà, óni tó à tá miran kũ pɔsiraome. Tera sà, tó ma ta ma de kĩnaa, akũ a né pì kú kũooro, ani game, zaakũ a pɔ kúame. Tó ó de dí né pì e ó téro, ani tá miran a zĩkũnaa gũn kũ pɔsiraome. Ma a zĩda kpà ma dea né pìi gēne ũme, ma pì tó mádi sune kãaoro, mani gĩ̃̃ a taaride ũ ari ma wēndi lén. Dikiri, n yã nna! Ñ tó mà gĩ̃̃ n zò ũ né pìi gēne ũ de à tá kũ a vīninɔ. Tó adi ke kũ né pìoro, mani fĩ mà tá ma de kĩnaaro. Ñsun tó mà yã vāni kũ ani ma de le ero.

Yusufu zĩda babana a vīninɔne

Yusufu dí fĩ à a zĩda kũ a ìba kũ ò kú gwenɔ are doro, akũ à pũtā à pì: Ákĩnɔ kũ á kú lanɔ, à bɔte á pínki! Kũ gbēke kú gwe doro, akũ à a zĩda bàba a vīninɔne sà. Àten ɔɔ dɔ gbānagbāna ari Misilanɔ mà, akũ Firi'auna bedenɔ a

baaruu mà. Akũ à pì a gbě pìnɔnɛ: Yusufume ma ù. Ma de
 kun ari tera yá? Akũ swěe kěngu, odi fĩ ò wèaro. Akũ
 Yusufu pínne: À namai. Kũ ò nài, akũ à pì: Makũme á
 dakũna Yusufu kũ a yia ò sù kãao Misila la ù. Tera sà àsun
 tó á nèsee yakaro. Àsun pɔ fě ma yiana yã musuro, zaakũ
 gběno surabana yãin Luda ma zĩ á are la. Nà kana busun la
 wè pladen dí. Oni bú baro oni pó kěro ari wè sɔɔro. Luda
 tò ma doáre are de ó buri bo aafia andunia gũn, mà á sura
 ba manamana. Adi ke ákɔno mé a ma zĩ laro, Ludame. À
 ma dite Firi'auna lédammari ù, a begwari ù, Misila gu
 sinda pínki gbě zɔkɔ ù. À ke likalika à gé ó de kĩnaa à one
 a né Yusufu pì Luda a dite Misila busu gbānade ù. À su ma
 kĩnaa la gɔno. Àgɔ kú kũmao kãni à vute Gosẽ busun kũ a
 neno kũ a daikoreno kũ a sãno kũ a bleno kũ a zuno kũ pó
 kũ à vɔno pínki. Mani a gwa la, zaakũ nà nigɔ kun ari wè
 sɔɔro domẽ. Tó lenlo, àkũ kũ a bedeno kũ pó kũ à vɔno ni
 kakate pínki. Ákɔno kũ Biliaminuo, a è kũ wéo kũ makũ
 Yusufu makũ mé maten yã oáre. À bèere kũ má vĩ Misila la
 yã o ma dene kũ pó kũ a èo pínki. À gé à su kãao la
 likalika. À vĩ à lòko a dakũna Biliaminu wakaaa à ɔɔ dò,
 akũ Biliaminu mlěa à ɔɔ dò se. Akũ à lé pèpe a vɔninɔa ní
 pínki kũ ɔɔɔɔ. Abire gbera a vɔninɔ yã ò kãao.

Kũ Yusufu vɔninɔ suna baaruu kà Firi'auna bea, à kène
 nna kũ a ibano. Akũ à pì Yusufune: Ñ o n vɔninɔne ò ní aso
 yĩ ní zaakinɔne ò fute ò gé Kanaa, ò ní de sé kũ n bedeno ò

su kũńwo ma kĩnaa la. Mani Misila bũsu gu mana kpámma ògõ nna ma. Ñ ońne do ò Misila zùgonɔ sé n né fítinɔ kũ n nɔgbẽnɔ yāi, ò n de sé ò su kãao. Òsun laasun lé pɔ kũ oni tó gwenɔaro, zaakũ Misila gu mana ni gõ n pɔ ũme.

Akũ Isaraila né pìnɔ kè le. Yusufu zùgonɔ kpámma lákũ Firi'auna ò nà. À zé zànaa kènne do. À n gbá uta zõkõnɔ n pínki, akũ à Biliaminu gbà andurufu ɔɔɔ mèn wàa do kpé basɔɔro kũ uta zõkõnɔ mèn sɔɔro. À Misila pɔ mananɔ kpàzã a denɛ zaaki aso kuri kũ pɔbleweo kũ pɔbleo zaaki aso kuri a de zé zàna ũ. Kũ à n gbàre à pì: Àsun fìti ke zénlo! Akũ ò tà.

Ò bò Misila, akũ ò kà Kanaanɔ bũsun n de Yakubu kĩnaa. Ò pìne: Yusufu kú wëndiio ari tera, àkũme Misila bũsu gbẽ zõkõ ũ. Akũ Yakubu kè sãii, adi síro. Akũ ò yā kũ Yusufu òńne òne pínki. Kũ Isaraila zùgo kũ Yusufu gbàre à a sɛnɔ è, akũ a laasun kè do sà, akũ à pì: Adikĩna mò! Ma né Yusufu kú kũ wëndiio ari tera. Mani gé mà wé siale de má kpé mà ga.

Yakubu tana Misila kũ a nɛnɔ

Isaraila dà zén kũ pɔ kũ a vĩnɔ pínki. Kũ à kà Beseba, à sa ò a de Isaaku Luda. Akũ Luda bò à sùà wégupu'ena a gũn gwāani à pì: Yakubu! Yakubu! À wèa à pì: Makũ di! Akũ à pì: Makũme Luda ũ n de Luda. Ñsun Misila gena damu kero, zaakũ gwen mani n buri karan manamana.

Mani gé kũnwɔ Misila mà era mà su kũ n burinɔ. Yusufu gbádan ñni gan.

Akũ Yakubu fùte Beseba. A nénɔ a dà zùgo kũ Firi'auna gbàre ò a séonɔ gũn kũ ñ nénɔ kũ ñ nanɔnɔ. Ò ñ pókādenɔ kũ aruzeke kũ ò lè Kanaanɔ būsunnɔ sète ò tàò Misila. Yakubu tà gwe kũ a négɔgbēnɔ kũ a nénɔgbēnɔ kũ a daikorenɔ ñ pínki. Isaraila kũ ò tà Misilannɔ tónɔn dí, Yakubu kũ a burinɔ:

Yakubu daudu Rubeni. Rubeni négɔgbēnɔ Anɔku, Palu, Ezerɔnu kũ Kaamio. Simeɔ négɔgbēnɔ Yemueli, Yami, Oada, Yakĩ, Zoa kũ Sauluo kũ à a ì kũ Kanaa nɔgbēo. Levi négɔgbēnɔ Gesɔmu, Koa kũ Merario. Yuda négɔgbēnɔ Ee, Ona, Sela, Perezĩ kũ Zerao, ama Ee kũ Onao gà Kanaame. Perezĩ négɔgbēnɔ Ezerɔnu kũ Amuluo. Isaka négɔgbēnɔ Tola, Pua, Yasubu kũ Simirɔnuo. Zebulunĩ négɔgbēnɔ Seredi, Eloni kũ Yalelio. Négɔgbē kũ Lea ñ í kũ Yakubuo Mesopotamianɔn gwe. Àkũ mé à a nénɔgbē Dina ì dɔ. Ñ buri pìnɔ ñ pínki gbēnɔn baraakuri awɛɛ'aakɔmɛ.

Gada négɔgbēnɔ Zefɔ, Agi, Suni, Ezebɔ, Eri, Arodi kũ Arelío. Asa négɔgbēnɔ Imina, Isiva, Isivi, Beria kũ ñ dāre Serao. Beria négɔgbēnɔ Eberu kũ Malakielío. Labā mé à Zilipa kpà Leaa. Buri kũ Zilipa kè kũ Yakubuan gwe. Ò gbēnɔn gēro awɛɛdomɛ.

Yakubu nanɔ Rahila négɔgbēnɔ Yusufu kũ Biliaminuo. Yusufu Manase kũ Eflaimuo ì Misila kũ a nanɔ Asena,

Elipoli sa'ori Potifera néo. Biliaminu négōgbēno Bela, Beke, Asabeli, Gera, Naama, Ehi, Rosu, Mupimu, Upimu kũ Adao. Buri kũ Rahila kè kũ Yakubuonon gwe. Ò gbēnon gēro donsarime.

Dã négōgbē Usimu. Nafatali négōgbēno Yazielì, Guni, Yezè kũ Silemuo. Labã mé à Bila kpà Rahilaa. Buri kũ Bila kè kũ Yakubuonon gwe. Ò gbēnon supplame.

Yakubu buri kũ ò tà kũnwo Misilanon gwe. Ò gbēnon baaakō awēesuddome a né nono baasi. Kũ Yusufu né ì Misila gbēnon pla, akũ Yakubu buri kũ ò tà gwenò kè gbēnon baaakō akuri.

Yakubu Yuda zĩ à done are Yusufu kĩnaa de à Gosē būsuzé mone. Kũ ò kà gwe, akũ Yusufu gè a sōgon à gèe da a dele gwe. Kũ à a lè, à mlèa à ɔ̀ dɔ̀ à gii kè. Akũ Isaraila pì Yusufune: Lákũ ma wé sìnle nà ma è ń kú wèndiio, ga ni fĩ à ma sé sà.

Yusufu pì a ṽninone kũ a de bedeno: Mani gé mà o Firi'aunane ma ṽnino kũ ma de bede kũ ò kú Kanaano būsunnò sù ma kĩnaa. Mani one kũ sādārinome á ũ, á pókādeno ṽi, akũ a su kũ á sãno kũ á blèno kũ á zùnno kũ pókũ á ṽno pínki. Tó Firi'auna á sísi, akũ à á lá bó zĩn adì ke, à one à pi á pókādedeno ũ zaa á kefennakegoro ari kũ a gbārao lán á dizino bà. Tó a òne le, áni le à vute Gosē būsun, zaakũ Misilano dì kakara kũ sādārinoro.

Isarailano vutena Misila

Yusufu gèe à yā ò Firi'aunane à pì: Ma vīnino bò Kanaanò būsun kũ ní sãno kũ ní blèno kũ ní zùno kũ pò kũ ò vīno pínki, ò sù Gosē būsun. Akũ à a vīnino sè gbēno soro à ní mó Firi'aunane. Firi'auna ní lá à pì: Bó zīn adì kee? Ò wèa ò pì: Ókōno n zòblerino, sādārinon ó ũ lán ó dizino bà. Akũ ò pìne: O su vute būsun la goro plame, zaakũ nà kú Kanaanò būsun manamana, sè kun kũ ó sãno blero. Ókōno n zòblerino, n ó gba zé ò vute Gosē būsun. Akũ Firi'auna pì Yusufune: Lákũ n de kũ n vīnino sù n kīnaa nà, n ní káte Misila gu manan. Ò vute Gosē būsun. Tó laakaridenon kú ní té, n ma póno nañne ní ɔĩ.

Akũ Yusufu a de Yakubu sè à gèe à mò Firi'aunane. Akũ Yakubu sa mana òne. Firi'auna a là à pì: N ka wènn gbaa? À wèa à pì: Ma kunna andunia gūn wè basuddo akuriden dí. Ma wè dí ká ma dizino pò ũro, akũ à yā'ūmmaa vī. À sa mana ò Firi'aunane do, akũ à bò a kīnaa.

Yusufu a de kũ a vīnino káte Misila būsú gu manan à ní gbá būsú kũ Ramese de a wéra ũ lákũ Firi'auna ò nà. Yusufu pòblewe kpà a dea kũ a vīnino kũ a de bedeno ní pínki on kũ onno ní dasi lén.

Nà gbānakūnaa

Nàa kè gbāna, pòblewe kú gukearo. Misilano kũ Kanaanò gbāna làka. Òten pòblewe lú, akũ Yusufu go kũ à kú

Misila kũ Kanaao sì pínki à tàò Firi'auna bea. Kũ Misilano kũ Kanaano ɔgo làka, Misilano sù Yusufu kĩnaa n pínki ò pì: Ɖgo kun doro. N ò gba póblewɛ. Nsun tó ò ga n wáraro. Yusufu pì: Lákũ ɔgo kunlo nà, à su kũ á pókãdeno, mani póblewɛ kpááwa a musu. Akũ ò sù Yusufune kũ pókãdeno, akũ à póblewɛ kpámma sɔno kũ sãno kũ blèno kũ zùno kũ zaakinno musu. Wè birea à póblewɛ kpámma n pókãdeno musume.

Kũ wè bire gète, akũ ò sù a kĩnaa a wè làa ò pìne: Dikiri, óni fɔ ò yake utennero. Ɖgo làka, akũ ó pókãdeno gò n pò ù. Póke dí gò ò kpámmaro, ókɔno kũ ó burano baasiro. Nsun tó ò ga n wára kũ ó buranoro. N ò lú kũ ó burano n fína bo kũ póblewɛo ò gò Firi'auna zòno ù, ókɔno kũ ó burano. N ò gba póblewɛ de òsun garo ògò kun, akūsò de ó burano sún gò tàraga ùro. Akũ Yusufu Misila burano lù Firi'aunane pínki, zaakũ Misilano baadi a bura yia, kũ nà n kũ gbãna yãì, akũ bùsuu gò Firi'auna pò ù. Yusufu Misilano sì zòno ù n pínki zaa n bùsu lén la gena a lé dire. Ama adi sa'orino burano lúro, zaakũ Firi'auna dìte àgò póblewɛ kpámma goro sinda pínki. Lákũ ò kú kũ póblewɛ kũ Firi'auna dì kpámmao nà, odi n burano yíaro.

Akũ Yusufu pì gbẽno: Ma á lú kũ á burano sà, a gò Firi'auna pò ù. Póblewɛn dí. À gé à tɔ. Pókẽgoro àgò a leu sɔɔrode kpá Firi'aunaa, a kpara ni gɔ́are pówɛ ù kũ póbleo. Àgò abire ble kũ á neno kũ á bedeno á pínki. Akũ ò pì: N ò

sura bà. Ì tó ò n ponna le dikiri, ò gĩ Firi'auna zòno ù. Akũ Yusufu yã dìte Misila à pì, burapɔ leu soorode nigĩ de Firi'auna pó ù. Yã pì kun ari kũ a gbãrao. Sa'orino bùsu mé adi gĩ Firi'auna pó ùro ado.

Yakubu wékena zã

Isarailanɔn kú Gosẽ bùsun zaa Misila. Ò n zĩda zĩte vĩ gwe, akũ ò né ì ò kàra manamana. Yakubu kè wẽ gẽro awẽepla Misila, a wẽ pínkipinki basuppla awẽesupplame. Kũ à kà gana, à a né Yusufu sìsi, akũ à pìne: N yã nna! Tó ma n ponna lè, ò n ɔ da ma gbáda gbáru ò gbẽke kũ náanio yã kemene. Ìsun ò ma vĩ Misilaro. Tó ma ka ma dizinla, ò ma sé ò bo kũmao Misila la ò ma vĩ ma dizi pìno miran. Akũ Yusufu pìne: Mani yã kũ n ò kenne. Akũ Yakubu pì: Ì la damene. Kũ à la dâne, akũ Yakubu gbãna lè a gòoa à donyĩ kè.

Yakubu Èflaimu kũ Manaseo ditena a zĩda néno ù

Goro pla gbera ò ò Yusufune a de ten gyã ke, akũ à a né gbẽnɔn planɔ Manase kũ Èflaimuo sète à gèe kũńwo. Kũ ò ò Yakubune a né Yusufu sù a gwa, à kokari kè à fùte à vùte a gádo musu. À pì Yusufune: Luda Gbãnasĩndapinkide bò à sùma zaa Luzu, Kanaano bùsun, à arubarikaa dàmagu à pìmene áni tó mà né i manamana, áni ma kara mà gĩ burino dizi ù áni bùsuu pì kpá ma burinɔa ma gbera n pó ù

ari ɔɔɔ sɪnda pɪnki. Tera sà né gbɛnɔn pla kũ n ń í Misila ari màgɔ su n kɪnaano ma pɔnɔmɛ. Eflaimu kũ Manaseo gɔ ma nɛnɔ ũ lákũ Rubeni kũ Simeɔo de nà. Né kũ ɪni ń i ń gberano mé onigɔ de n pɔ ũ, oni ń túbi ble ń vɪnino kɪnaa. Zaakũ kũ maten su kũ Mesopotamiao, n da Rahila gà zén Eflata kũ òdi pi tera Betilihamu léi zaa Kanaano bùsun, akũ ma a vɪ zén gwe.

Akũ Isaraila Yusufu nɛnɔ gwà à pì: Dínɔn gwee? À pì a denɛ: Né kũ Luda ma gba lanɔn gwe. Akũ Isaraila pì: Ñ mó kũńwo ma kɪnaa mà sa'ole keńne. Zíkũna Isaraila wé bùsa àten gu e manaro, akũ Yusufu nài kũ né pìnɔ. Isaraila lé pèpèńma à ń kpá a kùla, akũ à pì Yusufune: Mádi da yã mà wé sinle doro, akũ Luda tò ma n e kũ n nɛnɔ ɔɔ. Yusufu ń gó a de gbála, akũ à kùtene à a are pète. Akũ Yusufu a nɛnɔ kũ ń pla ń pínki. À Eflaimu kũ kũ ɔplao Yakubu ɔze kpa, akũ à Manase kũ ɔze kpa Yakubu ɔpla kpa, akũ à nài kũ né pìnɔ. Akũ Yakubu a ɔ pàkɔla à a ɔpla nà Eflaimu kũ à de dakũna ũ mìa, à a ɔze nà Manase kũ à de daudu ũ mìa. Akũ à sa'ole kè Yusufune à pì:

Luda kũ ma dizinɔ Ibrahĩ

kũ Isaakuo táa ò kãao,

Luda kũ à dòmene are

ma kunnaa gũn ari kũ a gbãrao,

a Malaika kũ à ma bo a vānin pínki

à arubarika da né díkɪnanɔgu,

à tó ògõ ní sísi ma tóa,
kũ ma dizino Ibrahĩ kũ Isaakuo tóo,
à tó ògõ kũ manamana andunia gũn.

Kũ Yusufu è a de a ɔpla nà Èflaimu mìa, adi kenɛ nnaro.
À a de ɔ kũ de à go Èflaimu mìa à na Manase póa à pì:
Lenlo Baa, gbě díkĩna mé à daudu ũ. N n ɔpla na a mìa.
Akũ a de gí à pì: Má dõ ma né, má dõ. Àpi sõ ani gõ buri ũ,
anigõ zõkõ, ama a dakũna zõkõ nigõ deala, a buri nigõ dasi.
Zĩ kũa à sa'ole kèĩne à pì:

Isarailano ni sa mana okõne kũ á tóo
oni pi Luda tó n gõ
lán Èflaimu kũ Manaseoo bà.

Leme à Èflaimu dò Manasenɛ are le.

Akũ Isaraila pì Yusufune: Ma ka gana, ama Luda nigõ kú
kãáo, ani era à tá kãáo á dizino b̀sun. Sekemu b̀su mana
kũ ma sì Amɔrinɔa kũ ma f̀nedao kũ ma sáo, ma n gba,
m̀kõn kũ ní de n v̀ninɔla.

Yakubu sa'olekena a ńnɔne

Yakubu a ńnɔ s̀isi, akũ à pì:
À kũ kakara
mà yã kũ ani á le ziakezi oáre.
À kũ kakara ma ńnɔ à sã kpá,
à á de Isaraila yã ma.
Rubeni ma daudu ma gbãna,
ma kana gõ léi né káaku,

n bèere deńla kũ n gbãnao.

Ŋ pāsĩ lán ísõ bà,

ama ãnigõ deńlaro,

zaakũ n didi n de gádoa,

n wute kũ ma nɔnɔ dokeo.

Simeɔ kũ Levio mé ò kɔ gbẽnɔ ũ,

ò pāsĩ kũ fẽnedao.

Ma lé kú í kakaranaa gũnlo,

ma baka kú í yãgõgõnaa gũnlo,

zaakũ ò gbẽnɔ dède pɔfẽ gũn,

ò zù gbátĩnɔ zòzò lákũ ò yei nà.

Luda láari bońma í pɔfẽ zòkɔ yãĩ,

à lé keńne í pāsĩke yãĩ.

Mani í kěkɔa Yakubu burinɔ té,

mani í burinɔ fākɔa Isarailanɔ gũn.

Yuda, n gbẽnɔ ni n tó kpá.

Ĩni n iberenɔ kũ í wakaaa,

n de nénɔ ni kútenne.

Yuda de lán músu bà,

ma né pìi dì su kũ tofekao

àdi gáte àdi wúte a tòn.

Dí mé ani fõ à a futee?

Kpata ni go Yudalaro,

a burinɔ mé onigõ gò kũna

ari Silo gé su,

buri sīnda pínki ni mì natene.

Ani a zaaki dɔ geepi lía,
ani a zaakine yĩ geepi lí manaa.

Sèwē nigõ dime

ani a pókasanɔ pípíio,
ani a uta pípí kũ geepi'io.

Sèwē ni a wé tēra kũ,
vĩ ni a saka pura kũ.

Zebuluni nigõ kú ísira sare,
a b̀usu nigõ de gó'itenɔ bàdɔki ũ.
A b̀usu lé ni ze Sidõ.

Isaka de lán zaaki gbãna
kũ à wutena aso mèn pla dagura bà.

Tó a burinɔ è ní kámmaboki mana,
akũsõ ní b̀usu pì vutena nna,
oni nate asosenaane ò zòzĩ ke.

Dã ni a gbēnɔ bo yān
Isaraila burinɔ doke ũ.

Dã nigõ de lán mlè kũ à kú zé sare bà,
lán pitiko kũ à kú zéwewe gũn bà.
Àdi sõ lé a gbáa,
de gbē kũ à di a musu léte a kpedangara.

Dikiri, madì wé dɔ n surabanaai.
Gada sõ, z̀ikarinɔ ni síngu,
ama oni léte ní kpedenɔa.

Asa póbłewe nigõ nísi vĩ,
póbłe kũ a blena nna kínanɔnɛen ani kpá.
Nafatali de lán gbětē lí
kũ àdi gǎ mananɔ bo bà.
Yusufu de lán lí né'iri
kũ à kú ísēboki sare bà,
a gǎnɔ dì poro à da gbìla.
Kàzurinɔ ni ibere séo,
ò péa kũ kàao.
Anigõ a sá kũna yīgānaa sari
Yakubu Luda gbānade gǎi,
a ɔ gbāna nigõ wǎna
Isarailanɔ Gbèsi kũ àdi done are yǎi.
N de Luda pì ni kpányĩ,
Gbānasīndapinkide pì ni arubarika dangu
kũ legũ'i kũ àdi bo musuo,
kũ arubarika kũ à katena zīte gbáruo,
de n nɔnɔ kũ n pónɔ gõ de nérandenɔ ũ.
Sa'ole kũ n de kènne
de ma dizinɔ póla,
à zōkō de kpi zīnɔla.
Luda tó arubarika dínɔ gõ Yusufu mīia,
gbē kũ ò dìte adona a gbēnɔ té musu.
Biliaminu de lán lewanna pāsī bà,
àdi léte gbēnɔa kɔnkɔ,

àdi ní póno kpàate okosi.

Isaraila buri mèn kuri awɛɛplanɔn gwe ní pínki. Sa'ole kũ ní de kènnɛn gwe baadi kũ a pɔo.

Yakubu gana kũ a vĩnaao

Akũ à pínne: Tó ma andunia tò, à ma vĩ ma dizino gbèwɛɛ kũ à kú Iti buri ɛflɔnu bura gũn. Gbèwɛɛ pì kú Makpɛlamɛ, Mamare ifāboki kpa Kanaano busun, bura kũ Ibrahĩ lù Iti buri ɛflɔnua gèvĩki ũ. Gwen ò Ibrahĩ kũ a nana Sarao vɛn. Gwen ò Isaaku kũ a nana Rɛbɛkao vɛn. Gwen ma Lea vɛn. Ò bura pì kũ a gbèwɛɛɛoo lù Itinɔamɛ. Kũ Yakubu lé dìtɛ a nɛnɔnɛ à làka, à èra à wùtɛ, akũ à gà.

Yusufu kùsi a dea à ɔɔ dò a musu à lé pèpɛa. Akũ à ò a zĩkeri ezedenɔnɛ ò ɛzɛ kũ àdi tó gè vāro máma a de gèɛa. Akũ ò màma Isaraila gèɛa ari gɔɔɔ bupla de àsun yagi kero yāi, zaakũ len Misilano dì ke lɛ, akũ ò a gè ɔɔ dò gɔɔɔ baaakɔ akuri. Kũ ò a gè ɔɔ dò ò làka, Yusufu pì Firi'auna ɔndenɔnɛ: Á yā nna! Tó ma á ponna lè, à omene Firi'aunane à pi: Kũ ma de ten ga, à tò ma la dànɛ à pì mà a vĩ mira kũ à kèkɛ a zĩda pó ũ Kanaano busun. Ñ ma gba zé mà gé mà a de vĩ sà, mani era mà su. Akũ Firi'auna pìnɛ: Ñ gé ñ n de vĩ, zaakũ à tò n la dàarɛ.

Kũ Yusufu ten gé a de vĩ, Firi'auna ìbanɔ kũ a bɛ gbɛ zɔkɔnɔ kũ Misila bùsu gbānadeno gèè kāao ní pínki. Yusufu bedeno kũ a vɛnino kũ a de bedeno gèè kāao ní pínki dɔ. Ñ né fítino kũ ní sānɔ kũ ní blènɔ kũ ní zùnɔ mé ò gò Gosɛ

bùsun òtēne. Sōgonō kũ sōdenō gēe kãao dɔ. Gbē kũ ò gēe zenē pìnɔn dasi manamana. Kũ ò kà Atada pówegbēkia Yoda bara, gwen ò wiki gbãna lèn ari, ò gè ɔɔ dɔ manamana, akũ Yusufu a de wēnda kè ari gɔɔ suppla. Kũ Kanaano bùsudenō è lákũ òten gè ke nà Atada pówegbēkia, akũ ò pì: Misilano gèkena zōkōn dí. Abire yāi ò tó kpà Yoda bara gu piine Abeli Misila.

Lɛn Yakubu nénō kè lɛ lákũ à òné nà. Ò a gēe sè ò gēeo Kanaano bùsun, akũ ò a vī Makpela bura gbèwēe kũ Ibrahim lù Iti buri Eflɔnua mira ũ gūn Mamare ifāboki kpa. Kũ Yusufu a de vī à làka, à èra à tà Misila kũ a vīninō kũ gbē kũ ò gēe zenē a de gè vīnō n pínki.

Yusufu náanikpana a vīninɔa

Kũ Yusufu vīninō è n de gà, akũ ò pì: Tó Yusufu ibere sè kũoo, akũ à ye à a vāni kũ o kēne pínki fīna bowere sō bi? Akũ ò légbāzā kēne ò pì: De n de kpé à ga à pì ò onne n ó taari kũ ó durunnao kēwá, zaakũ a vānin o kēne. N yā nna! N ó taarinō kēwá. N de Luda zòblerinome ó ũ. Kũ ò yā pī ò Yusufune, akũ à ɔɔ dɔ. Akũ a vīninō sù a kīnaa ò kùte a are ò pì: N zòninome ó ũ. Akũ Yusufu pīnne: Àsun vīna kero. Ludame ma ũ yá? Á ye à a vāni kemene yā, akũ Luda līte a mana ũ, de à le à gbēnō sura ba dasi lán àten ke nà tera. Àsun vīna kero. Mani á gwa kũ á nénō. Akũ à náani kpàmma à n laakarīi kpàte.

Yusufu ganaa

Yusufu kú Misila kũ a de bedenɔ ari à kà wě basɔɔro akuri. À wé sɪ Ɛflaimu sãkpenɔɔ, akũ à wé sɪ Manase né Maki nénɔɔ dɔ. Akũ Yusufu pì a gběnnɔnɛ: Ma ka gana. Luda mé ani su kpáái à bo kãáo bɔsu dín à gé kãáo bɔsu kũ à a lé sè Ibrahĩne kũ Isaakuo kũ Yakubuo gũn. Akũ Yusufu tò Isarailanɔ la dàare à pì: Gɔɔ kũ Luda ni su kpáái, à ma wánɔ sète à boo gu dín. Yusufu wě basɔɔro akuriden à gà. Akũ ò eze kũ àdi tó gè vãro màma a gèea ò dà àkpatii gũn Misila.